

四庫全書

集部

欽定四庫全書

集部

胡仲子集卷十九

詳校官庶吉士_臣朱理

中書_臣劉源溥覆勘

覆校官中書_臣孫梅

校對官中書_臣陸湘

膳錄監生_臣湯師錫

欽定四庫全書

胡仲子集卷九

明 胡翰 撰

謝翱傳

謝翱字臯羽建寧人也家故嬴於財父鑄居喪哀毀人稱其孝宋咸淳初翱試進士不第慨然求諸古以文章名家元兵取宋宋相文天祥亡走江上逾海至閩檳州郡大舉勤王之師翱傾家貲率鄉兵數百人赴難遂參軍事天祥轉戰閩廣至潮陽被執翱匿民間流離久之

間行抵勾越勾越多閭閻故大族而王監簿諸人方延
致游士日以賦咏相娛樂翺時出所長諸公見者皆自
以為不及不知其為天祥客也然終不自明且念久不
去人將虞我矣乃去而之越之南鄙依浦陽江方鳳時
永康吳思齊亦依鳳居三人無變志又皆高年遂俱客
吳氏里中得其餘日以自適一不問當世事翺嘗上會
稽循山左右窺祐思諸陵西走吳會東入鄞過蛟門臨
大海所至歔歔流涕晚愛睦州山水浮七里瀨登嚴光

釣臺北向舉酒以竹如意擊石歌曰魂歸徠兮何極魂
去兮關水黑化為朱鳥兮有喙焉食歌已失聲哭人莫
詰其誰何惟鳳與思齊深悲之初江端友呂居仁朱翌
辟地白雲源源故方干所居在釣臺之南翱率其徒游
焉願即此為葬地作許劍錄及翱居錢塘病革語其妻
劉曰我死必以骨歸方鳳葬我許劍之地鳳聞訃訖如
其言鳳字韶卿由太學生授容州教授治毛氏詩陳宜
中當國禮下之命其二子大登小登受業焉同郡黃潛

柳貫皆出其門好獎拔士有一善未嘗不與之進思齊
字子善其學本之外祖陳亮用陰補官攝嘉興丞數以
書干宋臣用事者言實似道母喪不宜賜鹵簿責父及
翁顧忌爭不力猶不爭耳又言御史俞浙以論謝堂去
職宰相附貴戚塞言路如朝廷何思齊雖有寒疾耳聾
遇事不以勢移不以貧屈自號全歸子云

矯仲子曰翰少客浦陽望仙華寶掌諸山從縉紳學者
問朝時事未嘗不喟然為之太息於是訪其論著之文

翺有晞髮集鳳有巖南集思齊有全歸集三家者惟翺
集備焉其辭隱其指微大要類其行事是時元新有天
下士大夫於宋事多諱書之鄞江任士林稱翺善哭如
唐衢豈其情哉豈其情哉

趙氏大墓表

洪武元年閏月壬午趙氏先世之喪既葬於金華縣慶
雲鄉青岡之七星原郡守高公昇題曰趙氏之大墓其
孫古愚於是具其族出世次所以發大而流遠者請識

而傳諸子孫初秦悼王在宋為太祖太宗母弟王第四

子曰德雍是為廣陵康簡王康簡生承亮是為樂平忠

靖王忠靖生克愉魏國文思公文思生叔直內殿承制

承制

闕

堅

闕

宮使正奉大夫始自汴徙家於衢則建

炎再造也今其寔實

闕

居昭穆之首碩人田氏祔焉宮

使生常熟縣丞諱公傳娶徐氏卒葬於衢常熟生長溪

縣丞諱彥鉷娶徐氏卒葬蘭溪今其寔皆為位而不遷

長溪之子遂昌縣令諱

闕

天居穆之次其配徐氏祔焉

遂昌無子以從兄憂夫之子為後諱時堯居昭之次其配徐氏祔焉是為古愚之高曾祖曾祖有子二人長諱若韶號退藏山人娶陳氏何氏李氏則其大父也次諱若隆娶童氏則從大父也竝各居昭穆之次穆之右則祔以伯父諱嗣淇嗣闕者闕父諱嗣淵者嗣淵之配張氏如之昭之左則祔以厥考諱嗣闕者厥妣葉氏如之考妣之次則古愚之兄古闕及其嫂張氏祔焉八世合二十喪皆獲從其窆窆尊尊也親親也所以昭有禮也

禮必本其所始所以昭有德也惟趙氏蟬聯累葉自汴徙衢至長溪丞又徙於蘭溪至退藏公又徙於婺今遂為郡人翰同里閭嘗獲交退藏之門聽其二子之議論未嘗不以前人藁瘞為疚丁時孔艱賁志而沒亦惟後之人亶其圖之故古愚古闕古忱篤于孝友不替其父命於十年之後既買地縣北婺女鄉奉以襄事今又改葬茲土克邁前跡是為有合於古者邦墓族葬之義故翰書之非徒示其子孫亦以為邦人勸

胡義士墓表

永康之魁山有義士焉曰胡君元祚其先建寧人也宋宣和中其遠祖志寧來為邑遂長子孫至今居之邑地西直鑿東抵處處阻險而俗獷山谷之間竊發弄兵積為民患及元之季郡邑兵起環處之境皆盜區也戍將石抹升之督兵討之勢猶不戢至正乙未縉雲弱溪之寇殷氏杜氏啖群亮以利大入剽掠橫殺不辜元祚慨然曰吾土皆王民吾雖力不能為國除賊獨忍鄉井罹

其毒束手視之邪走白邑令為防禦計散家財集少壯之丁立保伍之法大書其幟為義兵寇傾之不敢輒犯詐遣其徒來降尋乃旁出抄虜擣邑郭焚廬舍會官兵至元祚率眾助討之寇退兵駐邑中頗恣睢元祚扣軍門白主帥出旗樹於鄉約曰敢擾吾民者殺無赦士卒如約而元祚具酒肉禮其至者如初鄉民安堵令嘉其能檄所部團結悉如其法上其名於憲府憲府嘉之署曰義士胡某俾與方允中合而拒賊賊畏之至者不敢

越鯉溪而西時太平呂原明軍方岩致書元祚曰東南
當賊要衝君以身障之能杜其不至乎曷若去難就易
於計萬全也元祚曰吾衆以義合將以排難存鄉里耳
委而去之豈吾志邪益厲衆固守聞賊至山砦之民受
圍者輒出兵援之歲丁酉正月賊寇武平合德元祚大
破之逐北數十里二月丙午戰於前倉又破之賊數戰
不利明日乃盡勒其衆間道出方岩與呂原明戰巖下
呂不利其屬孫伯純歿於陣又明日賊復至與元祚遇

於占田元祚盡銳以戰顧謂允中曰賊衆我寡惟死關耳不可退而覆也自辰至午戰不利方允中呂伯川沒於陣元祚自分不獨生戰益力厲聲罵賊不旋踵死之至正十七年二月二十二日也邑令伊蘓岱爾聞其死輒泣曰吾為天子命更不能贏股肱効尺寸功而元祚起歔畝不費官一粟不取民一錢合鄉兵而贍之屢與賊搏雖斃於蜂蟻之衆不少挫其氣吾屬媿之矣其可使君之志不白於當世乎具疏其事以聞報未下明年王

師克婺城永康內附又十有一年朝廷修元史凡忠臣
義士於法得立傳余欲取其事載之無以究極其詳又
八年余至永康見其子裕問君所以致死裕哀形於色
為余言其先人之歿裕不能援而與之俱顧嘗圖其不
朽有韓先生循仁之狀宋先生濂之銘在余讀而悲其
不幸然未嘗不壯其為人當寇發難時巨族寒畯男女
扶攜走道上以脫一旦之命不顧宗祏棄骨肉者里相
比也將吏盡地自守玩愒以養寇畏縮以為持重不能

展手足者郡相望也計其人怖死不暇惡肯抗必死之
寇以不貲之軀而君亦何樂而為之無乃輕用其身哉
天下大義蓋有重於身者人不察也叛逆之寇義所不
容也吾討之義不容已也不幸而死固其所也君既死
而懷利計私者苟免宜若得志由今視之果能保其祿
位乎享其富貴乎就令有之泯焉無聞者多矣若君之
所樹立聞其風者莫不惜而慕之大義之在人心如此
百世之下有生氣矣君得年四十有八娶章氏繼趙氏

子四人趙出也長即裕次禔次祐次禔余既多君之義
又愛其子之能孝故撫其大節俾揭而表諸墓亦史氏
之遺意云

何遁山墓誌銘

公諱鳳字天儀其先澤州晉城何氏唐會昌間澤州亂
何氏南徙析其族辟地禰處娶三州而娶之著籍自淳
始歷五代至宋其十一世孫有諱棟者是為公之曾祖
其別出之族若殿講文定公基司農卿夢祥參政夢然

皆以學術貴顯故隸雖不仕而蔚為聞家隸生焯於公
為祖焯生璧於公為考璧娶應氏以淳祐十年生公生
二十五年而宋亡元有天下恥於折節當世業醫藥為
人治疾不避風雨寒暑治之常若不及無富貴貧賤必
具善藥與之或不償其直置之弗較所至人賴其濟元
貞初北遊燕趙用薦者授婺州醫學教授轉江西醫學
提舉公雖隨牒漫任意漠如也每風日清美則幅巾藜
杖盤桓姻舊間長者事之以禮少者接之以誠陳說前

代典故談謔俚俗瞭如阿堵前事文懿許公謙方羈孤
時落落不偶在里中時從公游公奇其才館於家以世
務機利迷罔他歧固勉以義令求其遠者大者文懿遂
決意於學學得其師猶未振也公悉出其家書貸之率
鄉人子弟師事之未幾而爭走其門矣夢然以道自任
雅尊事公見之必莊聞其言必傾耳以聽公長文懿二
十年以定泰二年二月十六日卒於疾文懿哭之盡哀
明年天歷改元遂以九月某日卜葬蘭溪州橫山下林

之原今公之墓有宿草者四十餘年矣天下皆稱文懿之賢而不知世不有郭有道之流為善者何所賴乎故其孫穆以前祭酒許存仁之狀來乞銘存仁文懿子也述其先人之言曰吾所以克禔其身克植其家者先生教也嗟乎斯足傳信於君子矣公號遁山美丰姿不事邊幅名鄉鉅人見者咸稱曰遁山先生

闕

其下枝

闕有子曰宗誠曰宗暎曰宗瑞孫曰

闕

次曰穆

闕

即

請銘者銘曰

道苦多歧吾何適也雖有鉗且寧弗闕也君子之善不
必已出也轅轅之助天下莫較其力也

譚紫甫墓誌銘

譚氏之先有國濟南歷城間春秋所書譚子是也譚子
國入於楚子孫散居楚地其在湘潭者則自豫章來徙
宋吏部侍郎世勣之後也由吏部闕顯校尉濟七

世矣濟從王師征伐以功授千闕

蒞官金華致

書來告曰濟生十有四年而大父歿踰年而父又歿後

十有二年東南兵起吾族存者鮮矣今焉下走幸不隕
厥祀聞諸禮云先祖有美而不知是忘其祖也濟惟前
人之休是賴敢忘之乎雖薄祜不足以繩祖武敢謂不
知乎是用撫其行事圖不朽於子翰惟禮有銘職在子
孫合而徵諸人弘至公也不忘其祖重本始也故不敢
謝按公諱安榮字榮父生而性慧能闕人授以孝
經隨口成誦喪父與仲兄偕處從兄闕無子公以其子
子之內外數百指公以其身闕有違言時

方承平州郡以權貴相傾有勸公仕者公曰吾非不願也顧有先人之敝廬可以避燥濕薄田可以供祭祀具饘粥讀書教子優游畢歲良亦足矣終不能與世乾沒以義自守累貲巨計與人交不吝施予人有緩急饑遺以粟喪濟以輶又斥其餘以修川梁除道塗蒙其利者歸德於公則曰吾要譽邪又謹事浮屠崇塔廟像設為莊麗具或訾之則曰吾求福田邪人聞其風咸知公為長者年七十有四寢疾久不愈顧謂其子自吾感疾明

旦且晷矣殆不起乎詰旦果卒公生宋咸淳某年十月
四日卒於有元某年正月二十八日後六年乙酉十有
一月庚申始從先兆葬於湘潭縣石塘山之原曾祖某
祖某湘潭縣丞考義先隱居不仕自號湘潭居士妣劉
氏配賀氏公之起家賀氏實欣助之通書算如素至老
年八十有四以至正十年二月一日卒是歲十有二月
某日祔葬子二人長應辰次應璋璋繼從父後女二人
適王必大賀世發孫男六人明福玄壽貴某貴即濟曾

孫男永齡曾孫女二人濟來金華去家數千百里計其先祖之葬且二十有八年中更兵變者十餘年人民就死赤其族者不可勝計而譚氏之宗祏獲全於土崩瓦裂之中續有春秋封爵之緒有孫奮其忠勤不失為

關

國桓桓之虎臣則前人潛德之光豈

不昭乎休哉銘曰

關

以行吾義不專乎利安其止足以全吾志不

貴

關

是謂鄉之善士其生也無愧其死也有餘裕矣

蔡基先墓誌銘

諸暨屠先生疏爽好士所與游皆當世名公鄉通州大邑賢豪詞翰之流與夫山澤布衣有志無所用而儕於耕牧者非是不屑也嘗為余言其鄉人蔡君基先之賢力學而不干進教行於家而自得於田里有足多者既又曰基先不幸折其左脛雖賢而無所用於世且世方以疾趨能巧相徵逐孰從而知焉余聞先生言固識之矣常恨不及見其為人數十年來天下履變先生既沒

蓋無聞矣於是而得先生之子澂之書為其友蔡權之
父請銘發書按狀視之則先生所言基先君也君諱嗣
祖字基先自曾大父柏大父行之父遇龍世為諸暨人
皆業儒母楊無子君次室呂所出也幼嗜學從鄉先生
受業昧爽輒挾冊先諸生以往遇溝瀆左足折其脛由
是出入不良於行矣然月朔謁先聖先師雖風雨大寒
暑必入學宮無廢禮言當世治忽人物賢否出處得失
雖足跡不離戶限問之而必知言之而必當若數計而

符節合也所居負陶朱山列時花木賓至即流連觴詠
以為樂元末兵興名三子語之曰吾讀書嘗有志於時
比以疾無能為矣今天下多故吾其休矣汝輩圖之汝
樞汝槩宜為余斡蠱汝權宜務學屠先生性吾關方
講學鄉溪之上汝宜從之君乃即邑之南塘營一關

力耕者十餘年兵勢益促未幾而其地悉為屯

關

挈東西未嘗戚於容及國家洗滌宇內寢就寧謚即欣
然攜老幼載圖書返於南塘題其居曰遺安庄

關

賦

詩落之而君亦將足其休焉之志復為太平之民優游
乎其間亡何遽疾而卒實洪武四年正月十日距其生
之歲大德丙午得年六十有六矣娶田氏先君卒繼王
氏子三人皆田出即樞槩權也孫二人曰照曰熙方田
氏沒時三子請治葬君曰吾以邵子範圍數策之豈久
人世者亦將觀化矣汝營菽塗俟吾歸同穴可也後二
年果符之又三年權以春秋中闕授延安中都縣主簿
樞槩咸克家鄉人稱之女一人適闕避兵走道中懼

不脫虎口投道旁沸釜以死

闕

死之事見元

闕

泯則君之賢不

闕

礪其所

闕

化於

闕

矣權既簿中都以洪武十年丁王氏憂明

闕

有二

闕

申卜地某山之原舉三喪合而窆焉世言越

多隱君子微屠先生吾幾失王駘今君已矣考其行事
益知先生之言為信又嘉權之孝激之義皆能成其父
之志有交友之道不謝其請也乃論次而為之銘曰

士之致遠以志而奮以學而勝不以疾而廢為吾之性

故張籍盲於目不育於心徐積贖於聽不贖於行洵作
墓先亦孔之聖生克有樹死克有承貽謀自身又何愧
乎古之人

韓復陽墓碣

吳郡韓奕既葬其先君之喪於郡支硎山之碧琳原而
墓石久未有辭於是乞銘於金華胡翰以疾不能趨拜
致書來告曰奕聞之公卿大夫貴而在上其賢可紀人
已知之雖歿而自足見於世惟窮而在下有善而人不

知知之而傳不遠無以自見於世則於法宜得銘昔朱子有是言而奕之先人不能踐之奕為此懼願先生有以昭之以蓋其不孝噫何言之悲也是用叙次其事韓氏系出魏國忠獻王故安陽人以南渡始家於杭旋徙於蘓高祖至君遂為蘇人君之曾大父曰某大父曰某而曰某者其考也妣唐氏君諱某字復陽少孤奉母以孝聞於鄉里鄉人以能子稱之力學好古尤精於醫家之說為人治疾由江而達於淮周遊貴人長者之門所

全活甚衆所至必求當世人物魁偉特達有才藝者承其下風即庸衆無所取長雖富貴人以富貴視之不屬意也淮陰龔璠遂昌鄭元祐在吳中為士林之望獨折行輩與君款洽四方來者問吳中士兩人者以君為稱首於是人知君之於醫蓋寓也元之始亂張士誠據蘇州恐衆不附大結人心引士類為已用或強起君君固以母老辭母亦遽曰是不可起也籍令富貴如汝家世何訖不就退然以奉親教子為務年五十在母旁依依

若孺子居園城中食飲必適母常愉愉無不堪意疾革
囑其子奕曰善事吾母吾負阿婆矣遂以洪武四年某
月日卒以是年六月某日葬春秋五十有四娶唐氏先
卒子一人女一人女亦先卒子即奕也其孫曰貽君為
人性亢而色溫見人有善欣喜動眉頰有過則面質之
人始若不堪而心卒愧服嘗論醫以為醫之為術與儒
者之學皆出古聖人而後世粗工皆庸妄去聖人遠甚
以庸妄業聖人之事又不習其書又不資於儒宜其失

之者多矣吾所以求賢豪之士意必有隱者焉及君得
烏傷朱彥脩所著格致論推本黃帝靈樞素問以為說
粲然當於心時彥脩歿已數歲君乃命奕從其門人盡
受其術奕讀書未嘗識余其於不斐之辭何取乎而欲
寄重焉余觀君之在吳雖不有位為公卿為大夫其平
生砥礪自可為搢紳學者稱道公卿大夫用事者一時
若甚炳烈苟怵於利害臨變故俯就折辱身隕名滅雖
鄙夫賤人皆得唾詈焉其得失相去為何如也故君子

之可貴者甚於爵祿矣矣也何患其不傳哉乃銘曰
有相之術不用於國用之靡疾遭世大擾不屈於暴處
之有道孝思孔樂奚不可作返乎玄宅則有子是若

王子智墓誌銘

昔石塘先生胡汲仲好施與而慎許可風烈皦乎當世
學者尊而仰之以言語文字借譽為重莫不彬彬可觀
然未有如古名節之士者先生既歿余發其遺書得一
人焉若王君子智何其見器之深哉方子智署慶元郡

更慶元趙誠之先生故人子也妻女流落先生致書貸
子智之俸以周其急先生在吳門豪富人有饋粟三百
石者叱而不受其視一郡吏五斗粟為何物顧吾義所
在屬子智為之先生嘗謂子智廉潔勇銳流輩中絕無
者也天下不以其言為過而信其人之賢余烏得而沒
諸王氏世為處麗水人曾大父師尹宋迪功郎大父日
章父英宋鄉貢進士妣趙氏宋瑞州守崇鑣之女君諱
臨子智其字也幼讀書即疑如成人既冠舉教官授慶

元象山教諭部使者魯山臧公見而材之不欲置君散地俾吏於溫由溫調台又調慶元其在台也臨海令李某貪暴威逼其民致死事聞於郡郡將脫之君持不可一繩以法台人為之語曰李木杓乃見王無藥蓋疾其掇取而幸其敗也濱海鹽竈戶私貨鹽以厲民民不堪誣以致傷人命連逮繫獄久之不得其情狀吏無以決君謂鹽無權貨死無屍傷其牘釋之及調慶元屬州奉化有林氏者出賈海上與漕船遇漕船擊而掠之有司

逮捕百餘人悉問狀扭置獄以強盜傷物主論死會朝廷遣秋官按獄擇君自佐至州按之君謂漕船轉粟京師殺傷人海上而事有起因別無始謀與規財劫盜者有差等矣宜貸死昌國有楮氏者以女贅繆氏子為壻楮氏死其弟誣繆氏子藥之君識之繆氏固弗藥也不當坐部使者楊某志曰囚屢更審慮豈皆誤邪君持牘覆白復詰曰此何例邪君曰吏奉活法苟當其可即例也二獄卒如君議郡隸元帥府時首帥瀆貨數撓郡政

郡莫之如何君條其不法十事白御史宋公帥聞之致仕而遁兩浙鹽運司歲調官督課至郡其吏恣橫凌轢有司因罔利以為市君又言其不法運使高公黜之吏以責還後至者戢不敢逞郡賴焉歷三郡於是考滿謁選行省議者以君枉斷妄理事綴駁不叙君辯訴於省于御史退休十有餘年意自適人或語及前故輒曰我命不達耳朝廷之臣必不壞法也已而中書報下事果直銓授龍游縣典史人意君困阨久矣寧無變志君戒

其諸子曰我洗手奉公今老矣豈為汝輩變所守邪汝力學足矣龍游衢屬邑衢守馬昂夫名諸邑令議均賦役而龍游之後獨署典史蒞之君曰役之不均吏弄法耳吾黨躬其勞於是吏不得為輕重守念其貧以君年老諷之君曰死貧可也尋感疾且死語家人曰死者必見祖宗不可無禮乃沐浴正衣冠而坐家人扶持之則又曰男子不死於婦人之手汝等宜退遂卧而卒是歲元統甲戌上距宋咸淳辛未君生之歲得年六十有四

嘗以平反林氏等獄薦升廉訪書吏檄上不報以易經
舉進士再試有司不中故雖有志於時謾謾刀筆間脫
穎不能以寸輒又囊而跋之然未嘗易其廉挫其銳也
以是為汲仲所知終身不踰蓋非學所及而得於天性
者如此君自號紫芝兩娶趙氏宋吏部尚書立夫之女
有子三人長景行次景仁景儀女二人孫男應期應朝
二人景行介而甚貧君卒十有九年始克葬又二十有
四年以狀來請銘其墓在葛翁山王氏先塋之南其葬

以至正十二年十月甲申相其力者吳士弘及弟閻也
銘曰

士之立身曰惟名節惟君有行著於困阨為郡之障為
縣之幙積勞孔多一命不獲有奮其銳有耿其潔湮亦
不汙摧亦不折與世轆轤之死弗奪匪曰予智法我先
哲先哲之言其潛則發君子之澤其遠不竭我為作銘
表茲玄宅以告其子孫世其清白

吳季可墓誌銘

吳氏世居棠原曾祖應尚妣張氏祖紹孫妣時氏包氏
黃氏考用和妣黃氏皆有善行凡浮屠之居往往割田
資之歲修報祀其故居既遷焚蕩蒙翳高垣大術猶隱
隱為人指目徘徊相顧蓋其起家非一旦僥倖發迹者
更宋元數百年子孫至今有餘休焉有元盛時蘭溪以
邑升為大州當閩浙之衝使客之往來貢賦之轉輸供
億恒仰於州州仰於鄉於是以里之正主之吳氏老人
重廉恥壯者懼並辱公年未冠輒請曰吾職也吾親幸

少安即趨至州日與吏相上下吏嘉其能不嚴而趣辦
衆目之以爲吳氏有子矣安得吾兒如吳氏子乎然公
雅不自多見人武斷苛取則曰吾不爲也小民忿爭一
言折其曲直人人悅服正有不法者聞之竊慙而懼州
凡十鄉南鄉之田畝稅二升有畸北鄉倍之稅入不均
而凡征需緣稅爲多寡益不均公率衆白吏稅不均不
能一朝更也征需不均更之反掌耳盍揣其本以畝計
乎於是有司計畝科征十鄉如一戊戌冬越國胡公兵

嚴州東窺蘭溪清野相拒州民不戒而越境就食邏得之以謀當殺公適見之部領問曰此謀乎公曰亦平民耳是何能為不如縱之公遂率以歸全活者數十人既而越國下蘭溪游兵四出居民竄匿公自山趨而下見旗者曰願見總兵安業以給軍餉旗者喜引至轅門越國一見壯其言進而撫之授以大杖署其字杖上命之曰違律暴掠者用此杖之軍旅萬衆紛沓見杖輒喘息去凡姻戚鄰黨之女婦男子被掠而驅匿者盡取以歸

家聚而寢食之衆賴以安洪武八年春有詔旨遣貧民
無田者至中都鳳陽養之遣之者不以道械繫相疾視
皆有難色獨公所遣掉臂走道上公且戒其子宜體上
德意無以私廢義公臨事有為類多如此環境之民倚
之為保障晚得目疾年六十有九以洪武九年七月三
十日卒於家即以是歲九月九日葬於其鄉上葉塢公
諱緯綺字季可長身而美髯望之巍如也在羣季中最
為有器識始家向闕被災即踰山而西度地八石溪據

衆源之會泉甘土美建屋數十楹數十年間居積益致其利皆公出獨見為之娶陳氏邑大家婦儀母道聞之有素東家政綜理皆自己出均一無間公之酬酢世故無內顧之憂此其助也公歿三年夫人時年七十有八言笑自若無疾而卒實洪武十二年五月某日也其葬則以八月八日祔焉子三人曰晉曰謙曰曖晉曖早歿孫男八人曰良曰英曰馬曰斌曰敏曰詠曰杲曰恭女三人曾孫男四人曰曾曰瑣曰恕曰采女三人公之孫

曰英者幼孤恒在公膝下能往來承祖父母意公歿英
治家事惟謹尋以事隸役三年祖母遂歿後歸哭於墓
下告於從父謙曰吾祖生不被祿位而流澤在鄉里在
子孫宜得銘辭以昭之失今不圖後將何待於是以公
從子知濰州事履之狀來請翰固公之里人也而又與
履交最久方履在濰州時不遠數千里遺履書曰吾世
以儒著籍守先人資產以樹門戶而立身齊家未嘗踰
先人一迹今國家署糧長而吾掛名焉懼豪長者好事

一旦有連吾老不免耳嗟夫何其憂深思遠也及英以
中都之役免歸果符公之言而人益知吳氏善慶之所
積於茲較然矣乃銘曰

積善若登莫知其增視其後昆其徵則明惟季可父克
謹其承頤然長身玉立端凝刻鄉之敝脫人於兵利而
不有聿覩升平居寵惟畏獨秉先幾比爾諸孫言如著
龜爾孫行矣三年而歸惟公之慶公則弗知我發其潛
爾孫之貽著於墓石昭哉孝思

商節婦誄

商先生淵之妻以兵而死於義吾友平仲既為之傳而
景濂又哀之以辭鴈鴈乎白於天下淵也不死其妻矣
天下之大義億兆人之所同也而於眇女子見之君子
從而與之曰節婦列其事而不原其心則余不可以無
言矣節婦之心何心也得之於天而人不與力焉良心
也良心也者在臣為忠在子為孝在婦為貞而臣也子
也婦也發於其心之所不能已者所謂義也故忠可教

孝可訓貞可勸而不能必其果於行惟其不可必奮而為之所以行吾義也故君有不得於臣父有不得於子夫有不得於婦而非教之所能為也百乘不足以為貴萬鍾不足以為富一日不足以為短千歲不足以為長而於名非有所計也以教為可成名為可榮此君子之論也天下之事出於議擬者患不能致果利害之際一髮不容不幸而動焉其心二矣故天下之士砥志礪行臨事而推軋者多矣而名節之美著於尺籍編伍之人

出於人之所不虞又其著者則窈窕變閨闈之秀而
確乎其不可奪毅乎其不可回若節婦者是也方事之
殷軍士之所利者貨寶耳女婦耳一旦奄至於邑而溺
之家骨肉不暇顧為節婦者逃則不脫止則汙辱遂溺
而死固其所也於死而得其死義也自靖而已自靖也
者心之所安也節婦亦得其心之所安而已兵興以來
吾鄉類是者往往有之吳履之妻死於自溺賈誠之妻
死於自溺姜氏之女死於自刎童氏之婦死於自刎張

氏之妻若女俱死於自刎此余所知者一日之間死者數人何其烈哉吳之妻謝賈之妻宋猶曰儒者於家有所聞習之有素也若姜氏童氏皆里巷富人非素有聞而積習者猶曰富人知所貴重可也若張氏者家不過編戶業不過牧圉一旦聞難其妻死之其二女死之其幼方笄又刃而死一家死者四人焉吾以是知天理之在人心不可泯藝倫之在天下不可易無貴富貧賤等耳生不愛其身死孰計其名無所為而為之者也自夫

人之歿今二十年矣惟宋氏嘗有列其事而見於紀載者他固寥寥然矣余於是取之附著於此其居不同鄉其生不同族其死義之心一也天下之為人臣為人子為士君子者誰獨無是心其可徒歆動於節婦之風哉余雅辱交於淵故著明其義為誄以泄其哀思焉節婦名真張氏與淵皆嵯縣人誄曰

有猗者蘭兮繁霜其悴之有瑳者瑞兮烈火其烹之雖則焚之彼則遂之固天也畀之

友琴生朱原良小傳

生以琴為古人性情之所寓視之猶古人何其善取友也大夫無故不徹縣士無故不弛琴瑟苟朝夕御焉由音以得其意由意以得其人雖尚友可也余方索居因生之所友而竊有望洋之思安得神領心會於千載之下耶

胡仲子集卷九

欽定四庫全書

胡仲子集卷十

明 胡翰 撰

弔董生文

余自京師南歸次於直沽沂流而達於衡漳過陵州
故廣川地也或曰漢江都相董仲舒墓在焉為文弔
之其辭曰

出國門以南邁兮涉衡漳而濟舟波流渾其若河兮道
既阻而且脩臨廣川之故墟兮曰夫子之首丘望原隰

以懷思兮悵欲去而夷猶嗟王風之不競兮人各驚其
私智道術裂而民散兮世已久而莫制燕趙固多奇士
兮僅有取其忼慨非天降大雅兮繫孰為之表礪聖垂
法於春秋兮志雖微而可即士明經以致用兮義非后
而不食徵天人以為言兮明災異之所辟引君致之當
道兮情眷眷於陞側嘉堯舜而樂三代兮得一士而不
能用苟不用其亦已兮國無人而曷重黜質直而見憚
兮弘飾詐而取寵用舍倒而莫察兮邪正溷而彌冗驛

不中夫犧牲兮執鸞刀而薦犁登藜味以實瓊兮瀝黃
流而注茲競利方以為員兮攬槩瓊而去之徒操末以
齊本兮引繩墨而止之下皇皇而靡所騁兮上訑訑以
為得孰好賢如緇衣兮孰惡惡如巷伯古固難於知人
兮詎多欲而不惑庸俟時之見察兮庶師言之允一謂
伊尹無以加兮雖管晏弗之企探淵源其尚眇兮又豈
游夏之儔類何一低而一昂兮槩未量乎夫子之志曰
正誼而明道兮不計功而謀利皦內顧而如斯兮揆王

佐亦奚異俾詭遇以獲禽兮固吾心之所羞比柳下之
三黜兮由直道以事人百里之飯牛兮豈汙辱而忘身
道有時而屈兮亦有時而伸諒天命之未違兮獨奈何
乎生民

憫真淑文

何斯世之昧昧兮耿獨抱茲貞淑曰降命之自天兮固
眇軀之所服肇兩儀於厥初兮恒正位而並育矧夫人
之伉儷兮豈云疏而異族昔結髮以承歡兮將偕老以

為期忽惡筭之在首兮遂中道而棄之惟國有大事兮
莫大於征伐之師既北面以奉命兮願委質以驅馳冒
白刃以爭先兮懼不得其所死苟死弗憚於素兮又安
足以痛毀相女婦之從夫兮醺一齊而不再力莫拯君
之阽危兮雖獨生其何待孫神之成夏兮陳迎嬰而捐
軀高廡之喪趙兮秦瞑目而與俱卓怒行其威教兮皇
甫繫而猶詬李斷臂於逆旅兮負凝骸以貽後諒風猷
之一致兮曠年歲而不可變襲芳菲以紉蘭兮又佩之

以雙珎仰三辰之在天兮心炯焉其昭晰即所安而自得兮吾竊哀丈夫之非烈

東征詩

有序

湖東行中書右丞李公以親賢之重總制軍民輯寧金華嚴陵信安括蒼廣信諸暨五郡一州之地諸暨城小而偏於張虜雖以重兵鎮之虜猶數犯境上今年春遂大率其屬入寇邊吏告警公合將士由嚴陵馳援距諸暨新城十里曰龍潭據其地與寇相持明日寇以我師

新集空壁豕突而前公望見即下令曰彼衆我寡惟効
死斬擊耳毋掠人馬貪而失利又仰而祝曰願天佑社
稷微臣不敢愛其生以縱敵於是將士皆奮公策馬陷
其中堅手槍斃數人左右縱擊遇者靡地躡而殲之流
血膏野斃者萬餘人逐北虜其驍將百數十人凱旋之
日上功幕府公推兩指揮羣帥之力居多天子嘉念之
賜予甚渥昔南仲召虎左右王室戡除寇戎詩人歌之
不以二人克專勤勞顧乃歸美天子之命稱誦四方之

平今日之事惟授任得人以故公與將士茂建厥績天下聞者皆知我師之固敵舉羣雄而脫其距角合海內而登於大一統之治昭哉徵乎其在茲矣不可啗無紀述廼叙而賦之以脩凱奏焉詩曰

天造草昧篤生真主暨厥良弼大啟土宇自淝之東郡邑棋布阻山帶川樹屏為固與敵相制邦之門戶匪親與賢疇克畀付桓桓我公兩有文武龍節虎符來自王所坐總省轄出奠邦土于宣于蕃孰敢余侮蠢爾張孽

竊活鼎釜以其螳臂抗我戎輅歲直乙巳中繩建斗大
袞厥亮窾入我阻偪我新城揺我黎庶勢如累卵爰其
可怖邊吏驚告公起馳赴軍于龍潭柵其高阜轅門方
樹士食未饁寇傾我勞謂可拾取蝟興蜂午鼎來縱橫
深絕其澗高馮其陵有輕我心不知我勁我用大奮奮
其忠貞師直為壯彼則何名以少擊衆在古可徵爰令
衆旅告厥神明願天保佑爾衆欽承毋利虜獲不竭股
肱望其前鋒公則是膺挺身躍馬其揚如鷹如鷹如虎

其徒然然如雷如霆孰震弗崩東戈就殞授刃乞生脩
泚紛紜席卷而平流血殷野橫尸一成匪曰嗜殺亦豈
窮兵寇來授首惟惡是懲既懲其惡亦固不矜亦莫不
寧天開日明衿甲旋旆肅肅其征椎牛饗士獻俘于廷
皇心允懌是用大賚公走入覲稽首拜錫明明我皇制
勝萬里師力臣武悉任指使滄海波平金微道啟防風
不朝塗山用入惠迪有慶從逆自殪公昔受鉞志在敵
愾繼今以往尚罔或怠不怠不亟公心抑抑下民是依

庶士是式為邦柱石以殿皇國皇國既平四夷既率公
之孫子與國罔極

招鶴辭

世言鳥之壽者必曰鶴稟氣最清恒游於陽遠可千
歲誠羽族之宗長仙人之控馭也余家二鶴其一縞
而緇頰頰而頂不丹與相鶴經言不類雅善舞其一
丹頂青趾羽毛娟娟甚淨潔方效舞而斃余憫之將
世所謂壽者非邪抑乘剛風駕飛仙下上於玄間固

不得而知也乃招之辭曰

鶴之去兮下土方櫓不可巢兮悵孰與之翱翔三桑無
枝兮望蒼門而未陽西母折勝兮恐鄧林之不芳鵠厲
吻而嘯號兮鷗銜矢以為長仁鳥高逝兮杳莫聞其歸
昌牛哀化而為虎兮雖含靈而無良莽蓁蓁而陸迥兮
括隱隱而機張疇復殪彼獬豸兮驅百怪以伏藏鶴之
去兮海是泊洑渙無垠兮深入冥漠天吳九首兮屹立
而可愕海童之么麼兮又唏而相薄歸墟合夫尾閭兮

三神峙而參錯何飛廉之弗戒兮舟欲進而忽却扶象
而駕虵魚兮將往來以乘蹻觀蕩蕩於天外兮求地軸
之所託懼鰲力之不任兮玄黃雜而揮霍鶴之翔無遠
遙大園於穆兮上積清寥澹至人之無為兮與清光以
遊遨騁騏驎於天路兮左玉女而右松喬齋騫騰於風
背兮吹參差之洞簫恍出有而入無兮非世俗之所服
憑高雲以結思兮極勞心之悽惻昔余覽夫幽經兮嘉
金行之肖儀曰吐故而納新兮歲千祀以為期朝潔神

於秋水分夕申警乎湛露曾日月之幾何兮忽溷濶而
莫之主仙既不可睹兮彼又得而馭之世不可以容穠
兮將羽化而去之萬類之芸芸兮何有於定姿習神奇
而馮生兮儵臭腐以焉歸焉何飛而戾天兮魚何躍而
在沼鳳何覽而來下兮龍何欲而能擾氣實使之然兮
孰觀其微妙夏蟲之疑冰兮取誚於知道上下為宇兮
四表為樊大和訢合兮含生孔蕃曷不古處兮樂全其
天麇折足於車子兮徒反袂而洒漣龜曳尾於泥塗兮

懼觸罟而造鑽觀既往而知來兮惟委順於陶甄援雅
琴以發彈兮聊釋余之中情亂曰山海浩兮蔽虧城郭
繚兮委蛇人民是兮今豈非芝三秀兮可療饑盍歸乎
來兮丁令威

白鹿引

士之在公者不欲以簿書刀筆自穢恒曰吾吏隱也號
於人而人稱之亦曰彼誠吏隱也有一人焉以刀筆稱
論其能則必以為訾已矣求若古人隱於吏者則自京

師達乎郡邑槩未之見焉何其鮮也今年秋余以疾歸
畊田里有白鹿生者與余過焉嘗聞鹿千百歲者始白
匡廬衡霍間古仙人乘之以遨遊於金庭不死之鄉安
肯屑意人世乎吾懼不足以承左顧生曰子以錙銖富
貴苟朝夕之生於岩穴者即仙也邪安土而不詭於人
類者非其儔邪則子亦不知道矣余聞而異之留與之
處投袂而去他日問諸其友則曰此武城周生也生客
廣陵辟地東南雖阨甚不戚貴人聞者辟以自佐即不

拒趨事襜褕然未嘗職吏牘或以吏訾之即笑視曰是
刀筆者何負於人獨白鹿生非吏邪其為人如此雖其
友亦莫盡知之古所謂依隱以玩世者其生也哉蓋學
老子者乃賦白鹿之引歌以招之云

鹿之呦呦兮彼姝者子非仙之儔兮尚何求兮鹿之伎
伎兮彼姝者子世莫係累兮是以從吾志兮大車連馬
吾不知所稅兮

少梅賦

少梅者以其抽毫象物託意於梅而命之也余為之賦則屈子所謂置以為像者云

夫何一嘉植兮忽肖儀而孰主解余衣以盤薄兮馳余思乎瑤之圃若有人兮獨立乎千古冰為魂兮玉雪其度澹遺世以逍遙兮負矯節而不可拔恍顚然而一見兮若經年之遠別散縞衣於空明兮駕飛龍以超忽情怊恍以搖曳兮氣漫汗而揮霍歟雲蒸而飈厲兮紛又繼之雨電撫陽關與喬如今齊造化於一指驚建木之

既櫛兮卷瑤華其何異靚嬋娟而凌波兮浩綽約乎崇
阿向北風而含韻兮承南服之沖和春渺渺兮何其望
美人兮天一涯折芳馨兮延佇將以遺兮所思大化不
傳兮細入無垠高下散殊兮其機孔神服貞白以自嘉
兮今胡為此滋垢也豈隨時而變化兮懼夫人之逐臭
也豫章不辨兮擣中繩墨棄厥菌輅兮矢蓬以為直憫
衆芳之蕪穢兮天肅殺以戒寒竊獨揆其中情兮豈云
異夫荃蘭何靈均之好脩兮結珮纓而弗睇吾將斂而

就實兮和商鼎以進帝嗚呼勗哉兮保茲令美世莫諒
其真兮尚識其似

湘筠辭

湘之山兮西迤湘之水兮東驚何箇簾兮孔多望不極
兮湘之浦帝子去兮雲中俾夫人兮延佇曾莫樹兮椒
蘭又莫搢兮蘅杜載雨兮載陰滔滔兮誰與渡將以遺
兮琅玕抱幽貞兮永固

于菰于歌

于爲于歌者唐魯山令元德秀之所作也開元中車
駕東幸德秀使童男歌於道上帝歎曰賢人之言也
而後世無聞焉庸取晉束皙補詩之意爲之歌曰

于爲于道不容車豈不容車戒無虞虎臣執轡無疾徐
省方巡守周八區皇不出守民不蘇皇出征皇躬弗寧
守以時古有程童何知皇孔明扇巍巍業兢如日之升
如月之恒不虧不傾四方觀厥成

風雷引

烈烈兮轟轟為颺兮為霆迅發兮震驚薄太虛兮下上
聲謂天濟兮孔仁孰司柄兮赫厥靈民無愕兮載寧威
既揚兮沛澤零

長清操

河水之清兮清且漣漪我泳其流兮而源之不知我飲
而鑒兮我何求思勗兮勗兮母揚其波兮母渥其泥

思沂操

曾氏有居越者睠焉不忘魯之舊鄉余以聖賢之道

不下帶而存也作思沂操以廣其志云

沂之水兮泱泱曷不歸乎以浣我裳我思兮孔長沂之
水兮湜湜曷不歸兮以沐我德我思兮心惻沂可思兮
亦可沂予鼓而舞兮喟吾之與兮

越水操

越水波波兮不可以方舟旋桓有魚兮不可以為鱗九
罟寸目兮豈不密且周惟魴及鮪兮竭澤是求有獺有
獺兮復跂于洲

長山操

長山之下兮翳翳其木易子原田兮亦有嘉穀孰馮於
陵穿余之屋不以我為虞兮反縱爾毒匪兕匪虎兮曾
莫我敢逐

瞻彼日矣

此美孝子愛日也孝子有母眉壽不能已其喜懼之
心焉故作是詩以美之

瞻彼日矣歲月其征言念母矣胡考之寧人各有生匪

恤我私母也在堂燕處孔時載省載溫載奉甘旨載笑
載言載酌之醴以志為養則有多祿如何孝思惟日不
足瞻彼日矣迅逾飛翰明登于天忽薄于山言念母矣
雖百其年此日不愛後視則愆亦既愛之匪金圭璧一
寸之畧天實我錫錫茲難老永有壽考孰慰母心惟忠
是蹈在昔張仲厥德允臧篤斯不忘錫類于家邦

之子于征

此美監

闕

陳生也陳生歸省其母因迎養於京師故

勗其行以慰其母心焉

之子于征有楚者衣翼彼北風翩其以歸豈忘在公爰恤爾私惟皇有命來慰母思之子于征言汎其艫明發于越夕濟西吳薄登于畿安車載驅惟皇有命將母來居之子有母令儀有怙養則有祿皇斯爾錫曷以報之顧懷罔極竭爾臣節延殫子職

新城額額

新城額額孰究安宅帝綏東人命我邦伯邦伯蒞止作

之司轄慎廼夙夜奮其桓撥弓矢斯抗戈銳孔鑠寇來
授首開門可斫新城撫撫疇敢余侮邦伯惟翰遵養其
旅野無舉燧田有栖秣偃旗卧鼓不試亦武如彼雷行
濡以甘雨民斯樂胥帝靡東顧自東徂西自南徂北芒
芒禹迹肇我邦域我民綏矣我公歸矣令聞令望執德
不回受祿不貲公則有之民何貺之薄言酬之惟天子
是眎下民是宜

南箕長好風

南箕長好風東畢復好雨陰魄生自西終夕成乖阻悠
悠望彼蒼脉脉不得語起坐酌酒漿北斗在庭戶

冬日何可愛

冬日何可愛夏日何可畏矯首問羲和羲和不傳轡寒
燠相代更天運自有常但惜愛日短不及畏日長

日出照高樹

日出照高樹翳翳綠當戶端居念友生淹泊何處所西
路阻且長東流莽回互豈云阻音容亦乃乏書素懷德

必有隣興言自中古振衣起予見此褐之父

鬱鬱孤生桐

鬱鬱孤生桐託根鄒嶧顛皎皎白素絲出自岱畎間一朝奉庭貢妙合良自然桐以為君琴絲以為君絃中含希世音置君離別筵征馬慘不嘶僕夫跪當前君行千里道豈惜一再彈南風日湫湫清商動山川和者昔已寡聽者今亦難

人生苦偏側

人生苦徧側莫處蠻觸間殺機起不測朝夕相構患尺
書下齊城九土封秦關用意何嶮崎舉世尚其賢湯泉
自長溫蕭丘自長寒天地有至性貧賤吾所安

維南有佳鞠

維南有佳菊風露發清妍離離綠玉樹粲粲黃金錢色
含坤裳美質抱日精圓蘊靈自女几滋布彌樊川既入
神后品還充仙子食中壽登百歲上壽延千年千年與
百歲何異瞬息間獨有幽貞節可比金石堅託以奉君

子歲晏期弗諼

擬古

一夕復一夕一朝非一朝昨見春花開
忽睹秋葉飄人非金石姿安得長不凋
窮年事觚翰駕言遠游遨手提具櫛
劍拂拭鷗鵲膏含精變光采上薄青雲
霄願君勿棄置佩此長在腰南山有猛虎
西江有長蛟斫蛟取猛虎始貴非鉛刀

白馬誰家子翩翩新少年寶帶千金裘
鞍垂兩橐鞬五

侯爭馳鞭七族莫比肩來往長楊間捷出飛鳥先朝從
羽林獵夜展秦樓筵前楹列庭實中庖具珍鮮趙女舞
雙袖吳姬調七絃張急調高起酒盡意彌堅恨無美人
贈中激壯士肝睽離各自愛重來還復然

節節復促促雄鳴雌自續借問此何音有鳥人不畜三
文被身體五采爛盈目聲諧九成奏靈出衆羽族自從
阿閭傾再改岐山下千年不來儀四野多暇曠世德誠
已微天路清且穆願因東南風吹度玉笙曲

長安萬里堠日日送遠行輕車列千馬驃騎懸雙旌西
出橫門道意氣傾公卿鉞戟夾左右部曲聯若星疾驅
呼延塞深入休屠城旄頭無時落邊風且莫驚單于方
力格中帳起心兵刻功燕然石受爵天子廷既獲世間
願復垂身後名借問毛錐子區區何足營

梧桐生朝陽不附衆木林上枝拂雲漢下根固重陰歲
久材質古斲為姚氏琴朱絃絀橫理加以玉與金徽軫
何粲粲清彈揚妙音重華不可見懷思意何深

千里不唾井與君相別難風塵雖異路恒願同悲歡在
金莫為缺在玉當為環聯以翠織成宛轉衣帶間相望
胡與越寸心良自堅日入已三商憂來翻百端遙遙託
清夢不知寒夜闌

日長自愛惜夜長復悽惻人生幾何時少壯已非昔涼
風動萬里起念南與北山川路杳杳車馬去不息燕趙
高聲名荆揚壯材力仲尼七十說未遇身削跡為雲不
上天馬能雨八極

昔聞崑山未結實大如黍一食能療饑再餐可輕舉太
和溢肌髮含真逐仙侶左盼東華君右招西王母蒼籙
手共開金冊笑相旅后皇降嘉種寧遣同宿莽杲杲晨
出日祁祁載陰雨煦被非一朝長此千萬古

飲酒須飲醇結交須結真貌合不足貴言合寧可珍長
安桃李樹家家是陽春常時握手者孰是同心人吳中
有雙劍一奉洛陽賓精靈颯以合萬里情相親

示順生

去日不可追來日猶可期朝采六藝英夕玩忘其疲海
是衆水積聖亦達人為挾冊自有得焉用比臯夔

明招山中人高義無等倫恨子弗見之一去五百春我
學如贅疣未成先悞身誤身身不淑誤世心不仁

大音在天地浩浩空山河作者推李杜於古未足多至
哉風與雅采之委巷歌世人事凋琢伐柯徒伐柯

嚴霜十二月雞鳴思遠道遠道方迢迢客行何草草竭
從汴水來復鼓秦淮棹秦淮梅柳樹物色今年早

東望赤城山送友人

東望赤城山遠在滄海頭
雨雪方霏霏行人不可留
衣裳好結束文采珊瑚鈎
早傳一札書為報東諸侯
書報東諸侯藿食懷遠憂
鄭虔所臨郡山多少田疇
居民煮海水海盡民始瘳
丹丘有羽人歲晏長悠悠

游仙詩

夙志慕仙術笑傲人間春
朝陪瑤池燕莫拂滄海塵
道逢安期生遨遊乘采雲
粲然啟玉齒遺我紫金文
天地

此中畢世人不得聞受之今十年留待逍遙君青鳥從
西來飛去扶桑津寄書久不到白首悲秦人

寄陳子尚錄事

東甌有一士周遊吳楚間一歲一歸養四十來作官人
生貴得意寄書忽長歎芳蘭委蔓草霜露復摧殘寸心
欲馬託相望隔山川出門道路惡起伏千萬端直性不
得遂此道自古然寄書當路者下流良獨難

禱興

至正壬辰之春余卧病始起遭時多故奔走山谷間
觸物興懷忽復成什合而命之曰襍興

蚤歲苦憂患况茲抱沈疴展轉不能寐夙夜如枕戈骨
肉交相持朋友亦屢過感時寒燠易無乃久愆和石閭
有三秀崑丘多玉禾達人貴知命永言心匪它

病起不飲酒客來意何如四座皆春風燕燕深相於富
有富貴交賤有貧賤趨古道吾所愛今人寧見迂忘情
衡門下言笑色粲腴忽淹崧康駕何煩翟公書

水煩魚不大馭促馬已疲法令貴寬厚牛毛安所施秦
風蕩六合賦役懸高卑料民事隱覈簿書日孜孜君卿
嘗見嗟諒者以為宜其勢如張弓後來誰弛之詩人咏
豈第勞人千載思

緣山列城郭歲久亦已頽羽檄來何方工作殷如雷六
丁運巨石泉扉蕩然開不知誰家墳暴露骨與骸古碑
置城頭歎息三徘徊死者何所知但為生者哀

巴陵韓希孟淑質自天挺一為軍中虜視死猶一瞑自

云瑚璉器不肯作溺皿借此清江水葬我全首領願魂
化精衛填海起成嶺皇天如有知許我血面請書帛字
不滅千歲光炯炯躑躅戎馬間丈夫可以警

野王有二老矯若雙鳳雛不栖惡木枝寧啄中田糈
翔千仞上覽德周八區赤符啟帝子鏘其應瑤圖一鳴
洞薶繡再舉凌天衢飄飄不可繫漢網亦已踈至哉高
尚風念此其誰歟恐非嚴光倫意乃董公徒

偶家長山下遂與世途遠泉聲挂屋角曉見池水滿日

出生清華風來送餘善大化無端倪寧謂心有眼床頭
遺古書歲月忽已晚玩之不能了聖哲有憂患

卧龍岡觀賈秋壑故第

宋祚移東南會稽國內地白日照城郭相君開甲第蜿蜒
龍臥岡高出列雉背雷曲立萬楹增雄踰九陞飛拱
凌丹霞交疏激清吹上極高明居下有幽深隧棲甲戒
不虞為計亦已至以此忠社稷寧復憂墮揚揚昧所
圖擾擾復多制崦嵫日西薄祝栗風南厲魯港十萬師

開鉦一聲潰木披本先蠹堤壞川如沛詩人謹厲階人
禍豈天意至今王夷甫百罰有餘戾摩挲岡頭石零落
重奎字山川一何悠蒼莽鴻飛外舊時賀老湖酒船總
堪繫吾寧慕賢達聊以抒長慨

呂梁碣

河水趨山東四曠無險塞呂梁扼其衝凜若萬強敵水
勢與石鬬終古怒未息舟行齟齬間衆挽不餘力進始
踰跬步退忽落千尺長年起相語茲土神所職登祠奉

嘉薦拜跪陳下臆船頭勇牽纜檣表高挂席好風東南
來送我天北極叱馭誠足欽垂堂詎遑恤昔聞莊叟言
有山在離石懸水三十仞魚鼈皆辟易孰聽天地性遂
拯生民溺鴻飛九州野吾願觀禹跡

夜過梁山樂

日落梁山西遙望壽張邑洸河帶樂水百里無原隰
葑蓼差交舟楫窅窕入劃若厚土裂中含元氣濕浩蕩
無端倪飄風向帆集野濶天正昏過客如鳥急往時冠

帶地孰踵萑蒲習肆噬劇跳梁潛謀固坏蟄古云萃淵
藪豈不增快悵蛙鳴夜未休農事春告及渺焉江上懷
起向月中立

益清堂為國子生張伯高賦

高堂思何浩宛若臨瑤池碧水皆種蓮垢氛安得緇玉
質皎自內朱華爛相輝不矜顏色麗豈憂零落滋馨香
無時發窈窕隨風吹堂中有美人佩服芳霏霏興言誰
與晤慨慕此良時寧無百年賞願結千載期流芳在人

世樹德諒如斯

書黃賀州平蠻事後

荆楚綿百越襟帶極遐裔連山限車轍外薄海無際風
氣何紛靡羣蠢動相噬古雖郡縣置畫地出租稅負險
恒自固犬牙植形勢聚若蜂蟻來散如鳥鼠逝堯仁不
能覆往往思一雉懸兵萬里外暴露蒙瘴癘亦有內齊
民誑誤混狂獬巢穴牢弗破根本先自殪天遺槃瓠種
出入民患害聖哲或不虞窮討良非計皇靈冒下土赫

赫火俱厲日月所出入有生盡懷徠賓賀嶠嶮間苞葉
久聯締遣吏得黃侯爲國開信誓王師不血刃緩頰下
推髻列功奏天子璽書遠頒賚賜以大銀盃副之金帛
對嶺海數十城安得百其喙我聞范史言此屬非難制
力弱校弄薄非可羌戎例漢廷慎擇守祝良復誰繼侯
今鬚盡白侯心甚豈弟分符浙水上應念東人勸蠻徭
尚有知東人敢忘惠作詩勸不墮庶以示來世

西村老人隱居

金瓶梅詞話卷之八
振轡起陳力投簪遂辭祿吾今見伊人逍遙在郊牧令
節春載陽芳辰日初旭鳥鳴高樹顛牛飲澗溪曲翳翳
桑柘陰藹藹來牟熟耰耒返故畝經過候新躅高榻生
風涼練衣無暑溽披帙欣自悟臨觴復誰屬情真不厭
客意豁已忘俗列生談力命老氏貴止足

夜宿寶石精舍

出郭隨稚子薄暮投山扉葉落故園樹危柯風更悲勞
生各已息不知夜何其上人池閣中燈火深相依盈樽

豈無酒多病久不持啖我園中菓飽我以豆糜出戶見
明月踏月褰裳衣悠悠故意長落落新知稀冉冉歲云
暮百爾慎所歸

京口紀行

大江風西來波濤一何浩我舟不得發徘徊越昏曉衡
運已朔易曜靈忽東杲早出南徐州草乾霜露少慘慘
沙塵飛軋軋車輪繞寒氣來薄人重裘僅如縞日高衆
鳥翔天末孤帆杳川流與岡勢合畱自回抱人生大塊

問孰能出其表勉為辛苦行並見顏色橋人言野多虎
前驅善相保顧非千金軀祇欲使穹昊共子陳此情歸
來卧蓬島

南京遇蘇平仲編修

南州苦寒月雨雪久不霽風沙滿長道四顧心飛揚君
子有行後束書歸故鄉故鄉浙水上遠在天一方父母
及兄弟皆別今五霜我昨來自東音問不得將為言起
居好良足慰子腸魏魏帝王都濟濟人物場噦噦爭先

鳴翩翩延高翔六館走相送如失孤鳳凰惜茲歲華晚
眷彼川路長臥聽吳門鐘歸共越人航上堂拜家慶兄
弟同樂康歡言酌春酒拜舞迎春陽願言千丈暉長照
百年觴

歸故山

西阜高見日今朝故山裏萬木風已微白雲忽孤起池
邊記昔行城郭無人至三秋相望深獨抱悠悠意出郭
懷所親復上橋南路大田美多稼嘉澤何慙度人皆望

金史已乃全言
卷十
秋實淒其已風露杖策陂中行低徊亦奚故

命童

今晨雨新歇日出東南隅草樹有佳色當軒散紛敷歡
言命童僕治我園中蔬幸此琴冊暇且復一荷鋤雖有
黽勉勞良足具中厨但恐惡草長不治成荒蕪世事每
如此豈敢忘勤劬

青霞洞天偕章三益僉事觀石橋

太末一為客倏忽三四齡常恐玄髮變未諧滄海情今

晨屬休暇文彥皆合并方舟濟沙步飛蓋指岩扃青霞
天之表赤日午正停息陰無擇木抱渴無藏冰寧知大
火維有此真福庭巨石跨千尺如梁架青冥深疑地肺
開洞見天光明玉樹交左右禽鳥無一聲涼風度如水
炎濁蕩然清昔聞偶奕者坐隱交心兵相持勢方急旁
睨耽若醒柯爛胡不歸海枯固其恒蠻觸遞翻覆大化
何由停不如飲美酒且置石間枰

張節婦

人生為夫婦結髮因相依恩愛在偕老零落中路歧夕
坐守空閨晨興簪惡笄身為張氏婦焚立將安歸願言
持寸心如石無改移上奉百歲姑下哺兩男兒兒雖媵
所出孰匪夫體遺烝嘗苟有託門戶亦足持瞻望恐弗
及勛勞庸敢辭鄉人敬婦德縣官尊母儀二子伯與仲
孝思長不衰相見髮種種猶說襁褓時故家海東頭波
濤誠渺瀰獨有雙柏舟可以濟艱危行者曾弗操令人
怨蛾眉

桐谷山房

客從山中來為言山中居種樹不作琴清陰常繞廬脩
然窗几間中有竹素書上窺聖人奧下挾百代殊寥寥
千古意問子今何如勿學臧與谷亡羊苦多途願企心
齋人不遠復爾初歸無庭前柯應見雙鳳雛

贈鄭生叔車

游子不顧遠停橈江上春冀方有來客白髮乃吾親十
年阻南北一見融心神天道諒不惱嗟嗟行路人



胡仲子集卷十

胡仲子集後序

孔子曰有德者必有言夫言心聲也心涵乎德而言發諸口非能言之謂也是故君子之行道心苟得之言則發之得乎深者發之弘得乎精者發之確唐虞三代之盛聖賢並作德之發於言者渾渾噩噩不可涯涘至孔子時格言大訓壹皆本乎德之發則郁郁彬彬然出其門者雖稍分其科終不愧乎孔子者也秦漢以來能言之士非不夥矣較於唐虞三代孔子之門則德有慊

焉逮及唐宋諸子間出得之既博發之尤醇使列聖之道晦而復明如日中天其亦無愧於孔氏之徒至今人樂誦而說聞之元氏有天下光岳之氣未分有德有言者迭起其間亦一時文獻之美剛生也後不得聆諸老之謦欬而窺其德之淺深嘗私竊為憾幸洒掃潛谿宋太史公及長山胡先生之門俱獲受其德教太史公所得也深先生所得也精其言之實確而弘者剛日諦玩之味於口既於心而不敢釋諸身也國朝初太史公出

握文衡居禁代天子之言言之發於德者有集傳於世
矣先生繼亦被召與修元史史成詔職詞垣以備顧問
而力以疾辭重賜白金文綺俾歸振教鐸於姑蔑之郡
未幾復以老辭還處長山之陽一日盡以其所著書命
剛曰吾老矣將以斯文授子子其勉之剛再拜受教惟
謹先生蓄德而著言本乎六經參乎史漢以及諸子句
乎其有聲炳乎其有光若明堂之朝嚴階陞盛冠裳而
侯伯華戎之分截如也若泰壇之祀列陶匏燔牲玉而

龍衮環冕之容恪如也先生恒不以為足逮老而志不
少棄每片言之出士林傳誦王公大臣爭虛左延譽以
不得見為恨而天下學士仰之如景星卿雲將謂再起
蒲車置於玉堂之署黼黻皇猷彌綸文化而整飭一代
之言不幸先生以今年春正月九日卒於家於是慕先
生之德思誦其言有未得者咸相與歎歎太息剛也不
敏安敢秘先生之言而靳其德敬倣荀卿賈誼諸書文
居詩賦之首編次成帙號胡仲子集通若干篇既請太

胡仲子集後序

史公序其端將與願學先生者同以為法而浦陽義門
王氏復之父子德先生之教言遂謀刊梓以傳王氏合
食五世斯豈非其義舉歟洪武辛酉冬十一月望日門
人同郡劉剛謹序